

Službene novine Kantona Sarajevo, broj 37/20

Na osnovu člana 26. i 28. stav (1) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka) i člana 23. stav (3) Zakona o dopunskim pravima boraca-branitelja Bosne i Hercegovine ("Službene novine Kantona Sarajevo", broj 45/12 - Prečišćeni tekst, 26/14, 46/17, 18/19, 20/20 i 24/20 - Ispravka), Vlada Kantona Sarajevo na 31. sjednici održanoj 03.09.2020. godine, donijela je

UREDBU

O JEDINSTVENIM KRITERIJIMA I PRAVILIMA ZA ZAPOŠLJAVANJE BRANILACA I ČLANOVA NJIHOVIH PORODICA U INSTITUCIJAMA U KANTONU SARAJEVO, GRADU SARAJEVO I OPĆINAMA U KANTONU SARAJEVO

I - OSNOVNE ODREDBE

Član 1. (Predmet Uredbe)

Ovom uredbom utvrđuju se jedinstveni kriteriji i pravila za zapošljavanje branilaca i članova njihovih porodica u kantonalnim organima uprave i kantonalnim upravnim organizacijama, Gradu Sarajevo, općinama u Kantonu Sarajevo, kao i svim pravnim licima čiji je osnivač Kanton, Grad Sarajevo ili općina u Kantonu Sarajevo, odnosno koja se finansiraju iz budžeta sa učešćem od najmanje 25% (u daljnjem tekstu: institucije u Kantonu Sarajevo).

Organi državne službe u Kantonu Sarajevo dužni su provesti poseban postupak bodovanja po osnovu ove uredbe shodno članu 39. stav (2) i (3) Zakona o državnoj službi u Kantonu Sarajevo ("Službene novine Kantona Sarajevo", broj 31/16 i 45/19) kojim je propisana prednost u zapošljavanju utvrđena posebnim propisima.

Poseban postupak bodovanja po osnovu ove uredbe organi državne službe u Kantonu Sarajevo dužni su provesti i prilikom zapošljavanja primjenom Zakona o namještenicima u organima državne službe u Federaciji BiH ("Službene novine Federacije BiH", broj 49/05).

Institucije u Kantonu Sarajevo dužne su primjenjivati bodovanje po osnovu ove uredbe pri zapošljavanju primjenom Uredbe o postupku prijema u radni odnos u zavodima, agencijama, direkcijama i upravnim organizacijama, pravnim licima s javnim ovlaštenjima na teritoriji Kantona, Grada i Općine, u javnim ustanovama i javnim preduzećima čiji su osnivači Kanton, Grad ili Općina, te u privrednim društvima u kojima Kanton, Grad ili Općina učestvuju sa više od 50% ukupnog kapitala ("Službene novine Kantona Sarajevo", broj 9/19 i 21/19).

Član 2. **(Rodna neutralnost izraza)**

Izrazi koji se koriste u ovoj uredbi, a imaju rodno značenje koriste se neutralno i odnose se jednako na muški i ženski rod.

Član 3. **(Korisnici prava)**

Pod braniocima i članovima njihovih porodica podrazumjevaju se lica iz člana 1. i 2. Zakona o dopunskim pravima boraca-branitelja Bosne i Hercegovine ("Službene novine Kantona Sarajevo", broj 45/12 - Prečišćeni tekst, 26/14, 46/17, 18/19, 20/20 i 24/20 - Ispravka) (u daljnjem tekstu: Zakon), bez obzira na godine života dok su u skladu sa propisima iz oblasti radnih odnosa sposobni za rad.

Korisnici prava u smislu ove uredbe su: članovi porodica šehida/poginulih, umrlih i nestalih branioca prvenstveno djeca, ratni vojni invalidi i njihova djeca, djeca umrlih ratnih vojnih invalida, dobitnik ratnih priznanja i odlikovanja i njegova djeca i djeca poginulih, umrlih i nestalih dobitnika ratnog priznanja i odlikovanja, branilac, demobilizirani branilac i njegova djeca, dobrovoljac i njegova djeca, organizator otpora i njegova djeca, veteran i njegova djeca sa područja Kantona Sarajevo.

Korisnici prava po ovoj uredbi su lica iz stava (1) i (2) ovog člana koja imaju prijavljeno prebivalište/boravište u Kantonu Sarajevo.

Član 4. **(Pojmovi)**

(1) Pod pojmom porodica šehida i porodica poginulog, umrlog, nestalog branioca, branitelj, dobrovoljac i organizator otpora, veteran, demobilizirani branitelj, ratni vojni invalid, smatraju se lica koja su definisana članom 2., 3. i 4. Zakona o pravima branilaca i članova njihovih porodica ("Službene novine Federacije BiH", broj 33/04, 56/05 - Ispravka, 70/07, 9/10 i 90/17) (u daljnjem tekstu: federalni zakon).

(2) Pod pojmom dobitnika ratnih priznanja i odlikovanja i članova porodica poginulih, umrlih, nestalih dobitnika ratnog priznanja i odlikovanja smatraju se lica koja su definisana članom 1. i 2. Zakona o posebnim pravima dobitnika ratnih priznanja i odlikovanja i članova njihovih porodica ("Službene novine Federacije BiH", broj 70/05, 61/06. 9/10 i 90/17).

(3) Pod pojmom članova porodice šehida i porodica poginulog, umrlog, nestalog branioca i umrlog ratnog vojnog invalida smatraju se lica definisana članom 17. federalnog zakona.

(4) Pod pojmom demobilizirani branitelj smatraju se lica definisana članom 2. stav (1) i (2) Zakona o pravima demobiliziranih branilaca i članova njihovih porodica ("Službene novine Federacije BiH", broj 54/19) i to pripadnik Armije Republike Bosne i Hercegovine, Hrvatskog vijeća obrane i policije nadležnog organa unutrašnjih poslova (u daljnjem tekstu: Oružane snage) koji je učestvovao u pripremama za odbranu ili u odbrani Bosne i Hercegovine u periodu od 18.09.1991. do 22.04.1996. godine minimalno godinu dana, pod uvjetom da ne postoje okolnosti iz člana 36. federalnog zakona.

(5) Pod pojmom članovi porodice demobiliziranog branitelja smatraju se lica definisana članom 3. Zakona o pravima demobiliziranih branilaca i članova njihovih porodica ("Službene novine Federacije BiH", broj 54/19).

II - KRITERIJI ZA VREDNOVANJE

Član 5. (Prioritet pri zapošljavanju)

Lica iz člana 3. ove uredbe imaju pravo na prvenstvo pri zapošljavanju, a na evidenciji su JU "Služba za zapošljavanje Kantona Sarajevo" ili su zaposlena sa nižom stručnom spremom od one koju posjeduju.

Lica iz stava (1) ovog člana ukoliko ispunjavaju opće i posebne uvjete za radno mjesto na kojem se vrši zapošljavanje i u skladu sa kriterijima utvrđenim općim aktom institucija u Kantonu Sarajevo i uvjetima ove uredbe ostvaruju prvenstvo pri zapošljavanju.

Institucije u Kantonu Sarajevo, u općim aktima kojima se reguliše zapošljavanje, obavezne su pored općih i posebnih kriterija iz stava (2) ovog člana, kao jedan od kriterija propisati poštivanje kriterija i vrednovanje iz ove uredbe u roku od 60 dana od stupanja na snagu ove uredbe, a do kada se ova uredba neposredno primjenjuje.

Institucije u Kantonu Sarajevo obavezne su prilikom raspisivanja javnog konkursa kao dokaz o pripadnosti branilačkoj populaciji tražiti dostavu dokumenata, koja su propisana u prilogu ove uredbe i čini njegov sastavni dio.

Član 6. (Vrednovanje)

Vrednovanje korisnika iz ove uredbe vrši se na način da se licu nakon bodovanja po osnovu općih i posebnih kriterija, nakon provedene kompletne procedure uključujući i intervju, na ukupan broj ostvarenih bodova, u zavisnosti od pripadnosti branilačkoj populaciji, dodaju i dodatni bodovi, tako da se na ukupan broj prethodno ostvarenih bodova dodaje postotak od istih i to za:

(a) dijete šehida, poginulog, umrlog, nestalog branioca bez oba roditelja 50%

(b) lice u statusu člana porodice šehida/poginulih, umrlih i nestalih branioca, pri čemu djeca imaju prednost 35%

(c) lice u statusu ratnog vojnog invalida i to od X grupe 27,5% + 0,3% za svaku narednu grupu invalidnosti do I grupe 27,5 - 30,2%

(d) lice u statusu demobiliziranog branitelja za 1 godinu učešća 23,5% + 0,1% za svaki mjesec učešća u Oružanim snagama 23,5 - 27,1%

(e) dijete ratnog vojnog invalida od X grupe 20,5% + 0,3% za svaku narednu grupu invalidnosti do I grupe 20,5 - 23,2%

(f) dijete demobiliziranog branitelja sa 1 godinom učešća u Oružanim snagama 16,4%+0.1% za svaki mjesec učešća u Oružanim snagama 16,4-20%

(g) lice u statusu dobitnika ratnog priznanja i odlikovanja dobija dodatno 10%

(h) dijete dobitnika ratnog priznanja i odlikovanja dodatno 5%

(i) lice u statusu organizatora otpora sa učešćem od 18.09.1991. do 15.10.1991. godine dodatno 3%

(j) lice u statusu organizatora otpora, veterana sa učešćem od 15.10.1991. do 15.04.1992. godine dodatno po 0,3% po mjesecu u datom periodu 0,3-1,8%

(k) lice u statusu maloljetni branitelj dodatno 2%

(1) dijete umrlog demobiliziranog branitelja i ratnog vojnog invalida dodatno 1%.

III. PRELAZNE I ZAVRŠNE ODREDBE

Član 7.

(Nadzor nad primjenom ove uredbe)

Upravni nadzor nad primjenom ove uredbe vrši Upravna inspekcija Ministarstva pravde i uprave Kantona Sarajevo ukoliko se radi o organima državne službe u Kantonu Sarajevo i Kantonalna uprava za inspeksijske poslove - Inspekcija rada ukoliko se radi o pravnim licima sa područja Kantona Sarajevo.

Član 8.

(Novčane kazne)

Novčanom kaznom u visini od 5.000,00 KM kaznit će se odgovorna lica organa ili pravnog lica zbog nepoštivanja dopunskog prava koje se odnosi na zapošljavanje branilaca i članova njihovih porodica, shodno odredbama ove uredbe i članu 23. Zakona o dopunskim pravima boraca-branitelja Bosne i Hercegovine i pravno lice novčanom kaznom u visini od 10.000,00 KM.

Član 9.

(Primjena člana 6.)

U roku od osam dana od dana stupanja na snagu ove uredbe, ministar za boračka pitanja Kantona Sarajevo će donijeti propis o bližoj primjeni člana 6. ove uredbe.

Član 10.

(Stupanje na snagu)

Ova uredba stupa na snagu narednog dana od dana objavljivanja u "Službenim novinama Kantona Sarajevo."

Broj 02-04-33615-12/20
03. septembra 2020. godine
Sarajevo

Premijer
Mario Nenadić, s. r.

Prilog:

**POPIS
DOKUMENTACIJE KOJOM SE DOKAZUJE STATUS KORISNIKA PO OVOJ UREDBI**

Redni broj	Pripadnost branilačkoj kategoriji	Naziv dokaza - dokumenta	Organ koji ga izdaje
1.	Član porodice šehida/ poginulog, umrlog i nestalog branioca	- Uvjerenje o statusu djeteta šehida-poginulog, umrlog i nestalog branioca - Rješenje o priznatom pravu na porodičnu invalidninu za suprugu šehida - poginulog, umrlog i nestalog branioca i - Uvjerenje o učešću u Oružanim snagama za šehida-poginulog, umrlog i nestalog branioca	Općinska služba za boračko-invalidsku zaštitu Grupa za pitanja evidencija iz oblasti vojne obaveze prema mjestu prebivališta
2.	Ratni vojni invalid	Rješenje o priznatom svojstvu ratnog vojnog invalida	Općinska služba za boračko-invalidsku zaštitu
3.	Dobitnik ratnog priznanja i odlikovanja	Rješenje o priznatom pravu na mjesečno novčano primanje dobitniku priznanja	Općinska služba za boračko-invalidsku zaštitu
4.	Demobilizirani branioci	Uvjerenje o učešću u Oružanim snagama	Grupa za pitanja evidencija iz oblasti vojne obaveze prema mjestu prebivališta
5.	Dijete: a) ratnog vojnog invalida b) dobitnika ratnog priznanja i odlikovanja c) demobiliziranog branioca.	Uvjerenje o statusu djeteta ratnog vojnog invalida Rješenje o priznatom pravu na: a) invalidninu, b) mjesečni novčani dodatak c) uvjerenje o učešću u Oružanim snagama	a) i b) Općinska služba za boračko-invalidsku zaštitu c) Grupa za pitanja evidencija iz oblasti vojne obaveze prema mjestu prebivališta